

— ديوان كتب القلم —

كتب

القلم

للشاعر / أيمن خليل

— للشاعر / أيمن خليل —



إصدارات دار الحسيني للطباعة والنشر والتوزيع

اسم الكتاب: كتب القلم - ديوان شعر

اسم المؤلف: ايمن خليل

رقم الايداع: ٢٢٩١/٢٠١٨ م

حقوق الطباعة محفوظة للمؤلف

لا يسمح بإعادة إصدار هذا الكتاب أو أي جزء منه أو تجزئته في نطاق استعادة المعلومات أو نقله أي شكل من الأشكال المعروفة حالياً أو التي ترد مستقبلاً دون إذن خطي مسبق المراسلات:

دار الحسيني للطباعة والنشر والتوزيع

المقطم الهضبة الوسطى الحي الرابع منزل رقم ٥٢٧٥ شارع عماد مصطفى

موبايل: ٠١١٤٤٠٥٩٩٧٥ ت: ٢٧٣٠٤٠٠٤

إهداء

أقدم لكم

ديواني الثاني "كتب القلم"

تحمل مشاعري ونبضات قلبي بكل الصدق

لعلها تروق لكم

مع خالص تحياتي

أيمن خليل

— ديوان كتب القلم —

— للشاعر / ايمن خليل —

تقديم

يسر مؤسسة الحسيني الثقافية أن تتبني طباعة ونشر هذا الديوان " كتب القلم " وهو للشاعر أيمن خليل ، وهو شاعر موهوب يحلق في سماء الشعر الحقيقي الذي يلامس القلوب ، ولسوف تتوالى إصدارات المؤسسة التي تلبي رغبات الشعراء والأدباء في كل مجالات الإبداع خلال الفترة القادمة ، ولا يسعنا في هذا المقام إلا أن نتقدم بالشكر الجزيل لكل من تعاون معنا في سبيل تحقيق أهداف المؤسسة في نشر الثقافة الحقيقية التي تعبر عن هوية الأمة ، وترتقي بالذوق العام وتواكب الحاجة الملحة لالقاء الضوء على ابداعات الشعراء والادباء خارج القاهرة ، ونخص بالذكر نقادنا الافاضل الدكتور حسام عقل، والدكتور على جاد الحق ، والناقدة رانيا مسعود ، والناقد عاطف عز الدين الذين يثرون الأعمال الأدبية بنقدهم البناء ، ان مشروع مؤسسة الحسيني

الثقافية مشروع طموح لاستعادة دور مصر الريادي الموكول بها في عالمها العربي منذ بدء الخليقة ، وسوف نمضي قدما لتحقيق هذا الهدف، وبذل الكثير من الجهد لإيماننا بأهمية الثقافة في تحقيق النهضة المأمولة لأمتنا . لقد قررت المؤسسة منذ بداية عملها أن يكون في أوليات عملها رعاية الابداع والمبدعين لاكتشاف المبدعين الحقيقيين في مجال الأدب ورعايتهم وإلقاء الضوء عليهم من خلال النقد البناء لتسهيل فرصة حصولهم على الجوائز العالمية في مجال الأدب من خلال نقاد مؤهلين للنقد، كذلك فقد أطلقت المؤسسة مبادرة ميثاق شرف المثقفين أفراداً ومؤسسات وجمعيات. ونود في هذه المقدمة أن نشير إلى ان اهتمام مؤسسة الحسيني الثقافية بشعراء وادباء الاقاليم شئى أساسى ضمن سياستها برعاية الابداع والمبدعين في كل مكان فهناك الكثير من المبدعين في حاجة لمساعدتهم والقاء الضوء على اعمالهم الادبية، والمؤسسة ليست فقط

— ديوان كتب القلم —

مجرد ندوات ادبية او ثقافية او فنية وإنما نرعى المبدعين في كل مجالات الابداع ، مثل الفنون التشكيلية وفنون المسرح والسينما وغيرها من الفنون. نضع بين يدي المثقفين هذا الكتاب ، آمليين أن يحوز على القبول والله الموفق

رئيس مجلس الأمناء

عبدالقادر الحسيني

— للشاعر/ أيمن خليل —

— ديوان كتب القلم —

— للشاعر / أيمن خليل —

— ديوان كتب القلم —

كتب

القلم

للشاعر / أيمن خليل

— للشاعر / أيمن خليل —

— ديوان كتب القلم —

— للشاعر / أيمن خليل —

دارت الايام

مرت الايام عليا
بفرحة رايحة وقسوة جاية
المودة بقت سراب
المواطنة بقت اغتراب
والمصالحة بقت احتراب
اتفرجوا الأعداء علينا
خططوا للعب بينا
واحنا تايهين بالسفينة
و الخيابة هية هية

خلينا قاعدين

قاعدين ف مطرحنا
والحزن..... يطرحنا
الدمع في عنينا
مات الأمل..... فينا
يامين يفرحنا
ويداوي.. ف جرحنا
م احنا اللي.... موتنا
الحلم..... بإدينا
خلينا..... أمتنا
ورقة... ف كوتشينة
يلعب بينا المكار
لعب الورق... و قمار
ولا حد..... بيدور
والكل..... بيحور
كثر الكلام عادة
بقى..... زاد و زوادة
ودمنا بيرخص
وجثتنا..... تترصص
ع الشط والشارع
والكل..... ببسارع

يلقط لنا المنظر
بالكذب يتمنظر
بس القلوب ماتت
حتى النفوس شاخت
بقي كل شئ وارد
مستنيين مار د
يرفع رايات المجد
يكتب نهاية وحد
وترجع الأمة
مرفوعة الهمة
ونبقى مطر حنا
و نعلي افرا حنا

خط القلم

خط القلم حرفه بألم

كتب سطور لما اتظلم

قصفوه وقالوا ده متهم

نزف كلامه مع المداد

شافوه الولاد ..وقفوا حداد

بكى النشيد..حزن العلم

خط القلم حرفه بوجع

خط الخطا ولا رجع

زادت دموعه لما اتوجع

———— ديوان كتب القلم ————

رد الكلام زي السهام

واجه عريضة بالاتهام

مكتوبة وبخط النوم

خط اللي خان واللي خدع

———— للشاعر/ أيمن خليل ————

دوقيني

دوقيني كل شهدك
خلي نني العين يشاهدك
كل صورة حلمت بيها
هي بالتأكيد مشاهدك
دوقيني الحلو كله
عيشيني بعطر فله
ضلايني بكل ضله
خلي عهدي يبقى عهدك
لوني معايا الليالي
حقيقي حلمي وخيالي
وافرشي وردك تعالي
دوبي سهدي و سهديك
دمانا
دمانا نبعها واحد

في شريانك وشرياني
وياذينا عدوا جاحد
عديم الأصل شرّاني
مفيش مسلم ونصراني
ولا أصلي و برّاني
أصولنا في التاريخ مصري
وتتعب يعلّ مصراني

رموشك سفينتي

رموشك سفينتي
وقلبي شرع
وشايف عيونك
مأسي وضياع
حجر واعاني
والف المواني
واجيب لك أمانى.
وأنهي الصراع

ولو كان بإيدي
حطير وأبقى جنبك
يا ساكن وريدي
ودايب في حبك
حعدي الليالي
واجيلك يا غالي
وأضم خيالي
بقلبي وقلبك

وحكتب حروفك

بلون كهـرمان
واتـرجم سـطورك
.. بدون ترجمان
واعيد اللي بينا
وحسعد سنينا
ونحكي حكايتنا
بتاعت زمان

رغيفي

عضّ قلبي مش حيوج
بس إبعد عن رغيفي
المشاعر مش تجّوع
الرغيف صاحبي و حليفي
لما اجوع الاقيه قصادي
هو مالي واقتصادي
هو م الاخر حصادي
ليه بتدبحني ف وليفي

رباعيات

أخلاقنا طالها الفساد

واحنا بنتفرج

والذوق في حالة كساد

ولاحد يتحرج

فن الهيافة انتشر

بالصوت وبالصورة

يا نرجع الأمجاد

يا إما بنهرج

قالوا في حب الوطن كلام كثير يتقال

حب الوطن مش بالكلام حب ا لوطن أفعال

بالجد ويا العمل ترقى بنا بلادنا

———— للشاعر/ أيمن خليل ————

بالوحدة ويا الأمل نعلافي كل مجال

راح فين لسان العرب دي لغتنا أم اللغات

راح واختفى وانضرب باللكنة واللهجات

ياأمة العربية اتمسكوا بيها

شرف حروفنا الاله نزلت بيها الآيات

أخلاقنا طالها الفساد

واحنا بنتفرج

والذوق في حالة كساد

ولاحد يتحرج

فن الهيافة انتشر

بالصوت وبالصورة

يا نرجع الأمجاد

يا إما بنهرج

ياللي في بحر النفاق
أمواجه غدارة
تارة حتاخذك فوق
وتغرقك تارة
اياك تفكر في يوم
إن الخداع دايم
لا حينفعك فهلوة
أوخفة ومهارة

سبيل النور

وفي مكة لقيت النور
عطور المسك ويا بخور
نهار ساطع وأليلها بدور
يهل عبيرها فواحة
في صحن الكعبة والساحة
قلوب بالذكر مرتاحة
ألوف هايمة تطوف وتدور

ورحمة ربنا حلت
ونفحة من السما هلت
وبركات الإيمان نزلت
وبين الذكر والقرآن
هدايا العفو والغفران

بتنزل من إله رحمن
قلوب تايبة ورب غفور
وفي الروضة وقفت دعيت
في محراب النبي صليت
وفي ركوعي وسجودي بكيت
وقلت يارب طمني
وتقبل عمرتي مني
من الجنة ما تحرمني
وتهديني سبيل النور

حوار سجالي بين (س) و (ص)

(س)

ممنوع من الكلام
ممنوع م الإتصال
مجبور ع الإلتزام
ممنوع حتى الفصل
باخذ منك قساوة
ومفيش عندك هداوة
صارت بينا العداوة
ودى أسوأ الخصال

(ص)

شكالك غاوي المشاكل
وتحب الإعتراض
ماكفاية انك بتاكل
ده بجد مش اقتراض
إياك تاكل وتتنكر

ماهي حلوة الدنيا سكر
واوعى دماغك تفكر
في معارضة وانتقاد

(س)

هو حرام السؤال
ولا حرام الإجابة
بتعبي في الشوال
وبنشحت ع الربابة
بتدوس على الفقير
وكأنه شيء حقير
ما صحيح أنك غفير
واحنا... شوية غلاية

(ص)

غفير يلهف أبوك
مش عاجبك إمشي غور
راح اجيبهم يضربوك
تنشده ع الوابور

جاتكم نيلة وثقيلة
ناس باردة صحيح ثقيلة
مش حافظين الجميلة
عاوزين ضرب بساطور

(س)

ياخي روح منك لله
طلعتوا عين أبونا
الحق ما بينا تاه
زحلقونا بصابونة
مكتوب الغلب لينا
وتقول حقاك علينا
زودتوا القهر فينا
والآخر تحرمونا

زهري

صباحك زهري ومنور
على خد الجمال والذوق
وقلبي م الهوى مليون
بشحنة من الغرام والشوق
يا أجمل واحة فواحة
ورقة ورد ع الساحة
ونغمة حب صداحة
انا العاشق وانا المعشوق

زرعت وردي

زرعت وردي بيدي
نورت بستاني
رويته عسلي وشهدي
شبعته بحناني
إديته وعدي وعهدي
حسسته بأماني
ولما زادت حلاوته
وبان عليه الجمال
شعر بحبي وغلاوته
وساق عليا الدلال
حسيت بمكره وشقاوته
منعت عنه السؤال
يمكن يحس بغرامي
أرجع له من تاني

صباح الأمانى

صباح الأمانى
يازينة الموانى
صباحك حنانى
وغالى عليا
صباحك هدية
لقلبي وليا
صباحك ده غية
وانا المعجبانى
أصبح وانادى
وابوس الأيادى
وأقدم ودادى
لأجمل صببية
ببعت وسامى

———— ديوان كتب القلم ————

وحبي اللي سامي
يا أحلى الاسامي
هنا .. اسكندرية

———— للشاعر/ أيمن خليل ————

لما حبك اشتراني

لما حبك اشتراني
بعث كل الكون وجيت لك
عشت فاصل م المعاني
والليالي وسعت لك
دوبت وياك... في الحقيقة
والنجوم كانت رقيقة
كل لمسائك رقيقة
والأمانى فتحت لك

انتي فينك

شوقي حارق قلبي لسة
همي داخل قلبي خلسة
وانتي فينك مش لافيكي
فين عنكي فين اديكي
نفسى احس بأي لمسة
أو بهمسة ..أو بلحظة حب صافي
ينهي أحلامي اللي يأسه
بفنكر يوم ما تقابلنا
والمحبة ... بتبادلنا
كنت حاسس إن روجي ويا روحك
في السعادة إتبادلنا
فاكرة لما جريت عليك
شفت لمحبة حب صادق
نورت جوة ف عنكي
كنت زي الطفل طير م السعادة
واترمى مايبين اديكي
التقيت روجي بتحضن نني عينك

ايوة عينك ..
بس كان بيني وبينك
كنت قاري لهفتك .. وبتتقلي
كنتي عاملة انك بتتسي
وانت من جوة كاينك تسألني
قلبي اللي حبك من زماان
مالوش مكان غير جوة قلبك والحنان
حاسس بلحظات الأمان
وانا بين إيديكي ..
ويارب بس تصدقي

سنين فانت

سنين فانت و عدتها
ورغم القسوة عدتها
ويوم ورا يوم غيوم وهموم
لدرجة إني عادتھا
ولما الفكر أوحالي
قعدت شوية مع حالي
لقيت روعي كباقي الناس
وحال الكل من حالي

سلطان

أنا السلطان ومتسلطن
عشان تعرف وتتفطن
ولو خاويت ملوك الجان
حتلقى شعري متحصن

أنا السلطان ومتسلطن بتاج شعري
عشان تعرف وتتفطن بكام شعري
ولو خاويت ملوك الجان يحاربوني
حتلقى شعري متحصن وطوع أمري

انا السلطان ومتسلطن بتاج شعري ومتقدر
عشان تعرف وتتفطن بكام شعري دة لو تقدر ..
ولو خاويت ملوك الجان يحاربوني ولا يأنر ..
حتلقى شعري متحصن وطوع أمري
عليك يقدر ..

صباحك شوق

صباح بالشوق يشاورلي ..
يناديني .. يحاكييني
أقرب منه يطربني و يشجيني
ويعزف م النغم ألحان..
ويرسم ع الوجود ألوان..
بلمسة سحر من فنان
صباحي معاكي له حكاية..
وقصة حب تحييني..
صباحك وردي ومزهر
وفارد نسمة لمداه..
صباح بالحب متعطر..
ببستان الأمل ونداه..
يا بسمة عمري من بدري ..
ياشمسي و ضلتي وبدري ..
يا شاغلة القلب لو تدري ..
صباحك ع الوجود فارد ..
جناح الشوق وروحي فداه..

صباح النور
على عيونك يا ست الحور ..
صباح غالي ومن قلبي
ياساكنة في صميم قلبي
ودايب في الهوى قلبي
وعلشانك أعدي بحور..
صباح الفل والياسمين
ياطارحة م الجمال بساتين
صباح الرقة والهمسة
وانتي الشط والمرسى
وعنواني وأحبابي وأهل الخير
وقلبي مالغرام هايم وطاير طير
صباحك في الأفق بَدْر
وعطرك فاح عبير عنبر
ونور لي طريق عمري وخط السير .

صباح الخير

صباح الخير على الأحباب
وفاتح للمحبة الباب
صباح بالإبتسام بادي
صباح بالود بينادي
وفارش بالزهور وادي
يعطر جوّنا الخلاب
صباح الخير على خدودك
على قلبك .. على حدودك
على الضحكة اللي بتزينك
على رسمك وتكوينك
بلون الفل تلوينك
وطرح الورد على عودك
صباح الخير على نهارك
يا فارشة بالحنان دارك
يا فاتحة للجميع قلبك
مقدارك يا غالية يعز

صباح رفر ف على جبينك
على حدودك وتكوينك
على توبك على لونك
على أهلك وعاشقينك
صباح الخير على سماكي
على أرضك .. على هواكي
على بحرك .. على نيلك
وغنوة شوق تغنيك
وحرف جميل في مواويلك
جناين خير محوطاكي

أصل الهوى

أصل الهوى .. لما استوى
القلب من حبه ارتوى
والبحر شطه وميته
من تاني ... يجمعنا سوا
ياموج غرامي .. ومركبي
يا شرع حنانه قربي
يا شمس طالة. من السما
دفي القلوب ... ما تغربي
انا وانت تالتنا الصفا
حسيت معاك طعم الدفا
حتى الجفا ... عنه اختفى
يا سعادة عني ما تهربي
صعب الوجد في الغرام ..
لما الحنين يشتد ..

والدمع ليه يا حرام..
نازل بحور ع الخد.
هجر الحبيب والخصام
مر و عذاب وسهد
والصلح لو بالكلام
ورد وربيع وشهد

صرخة

صرخة وجابت في المدى
وليها ميت مليون صدى
صوت الضمير زي النفير
طلعت وعمت في الفضا

ومين يشوف فينا الألم
يسمع صراخ والام ودم
على صوت بارود .. ولا القيود
ولافيش وعود ولا فيش ندم

مقهور ياقلب المظلومين
ومين يداوى الجرح مين
الظلم عم .. نهاره غم
وليله هم الشقيانين

صباحك حبيب

صباحك حبيب .. ياقلب الحبيب
صباحك مداوي .. صباحك طبيب
أشوفك .. أبوسك .. وألمس خدودك
وشطك وبحرك لقلبي قريب
عيونك .. ولونك .. حنانك .. جنونك
وموجك يدوخ هوايا بلهيب
أطبب عليك .. وعيني ف عنيكي
واحس بإديكي ده حسك رهيب
.. قمر بالنهار .. وليك فنار
عيونك محار .. و رمشك عجيب
أشوفك معايا .. هواكي هوايا
يا فرشي وغطايا .. بعيدك قريب
ماريا .. هدية .. ورب البرية
وأدعي بنية .. وربك مجيب

على جبينك

وحرسمك على جبينك
أمل يسعد محبينك
عشان بكرة أنا حاسس
يعود نجمك وحينافس
ويمسح حزننا البائس
وتبقي فوق عدوينك

وحرسم ورد على خدك
وافصل توب على قدك
واعيش واقف في محرابك
واطهر روعي بترابك
واطير مع كل اسرابك
وأزرع بالأمان أرضك

وحنقش بالورود بابك
معايا كل أحبابك
نزين كل أعتابك
ونكتب حلمنا كله

— ديوان كتب القلم —

يساعنا كلنا ضله
نشم عبير نسيم فله
ونمسح اي سوء صابك

— للشاعر / أيمن خليل —

طماة

حبيبتي ف حبي طماة
بنار الغيرة ملتاعة
ولما أغيب أو اتأخر
بتستناني ميت ساعة

ولما أجيلها واحكيلها
الاقى عندها... تشكيلي
أدلع فيها واغازلها
تعاتب فيا.... تبكي لي

يا قطة في الغرام.. مالك
مفيش والله بجمالك حد
وليه سهم الشكوك .. طالك
ده حبك عندي فاق الحد

———— ديوان كتب القلم ————

أوام ألقى هواها يميل
وسحر دلالها يتعاقب
وتحلى النسمة ويا الليل
لأول فجرنا الرايق

———— للشاعر/ أيمن خليل ————

طلة واحدة

طلة واحدة من عيونك
تنتهي أحزان زماني
ياللي لون الورد لونك
حضنك الدافي أمانى
لما افتح عيني واسرح
والجمال ف كل مطرح
صدقيني قلبي يفرح
وابقى طاير من مكاني

عندليب الدقي

يا عندليب الهنا
بسقيك أنا ببوقي
وطير على حيننا
م العتبة للدقي
أفرد جناحك ... شوق
واحضن سامانا... لأفوق
عاشق هواك .. معشوق
والقسمة من حقي

يا عندليب الهنا
نقر على الشباك
مكان غرامك هنا
وأنا قلبي ... يستناك
سابق عليك ... رقتك
أنا دوبت في محبتك
ما تقولني ايه .. سكتك
علشان أطيير وياك

عناقيد الغرام

قالوا الغرام عناقيد
غار العنب..... منه
نار المحبة..... تزيد
ومشعللة..... بفنه
خلى الليالي... تقيد
والشعرا..... ييفنوا
إبداع كلامكوا يزيد
و حروفكوا.... بيجنو
أقطف حناني ودوق
عندي الحنان.... كله
مهما تلف..... السوق
لابد..... ترجع له
ساييك بنار.... الشوق
وحتيجي و... تميل له
انا طرحي عالي. لفوق
بالسحر..... بيطلوا
أصل..... انت لاغيني
إمتى..... تلا غيني
تاهت حروف... القول
عيني بقت غيني

عنقود حنان..... الهوى
طاب م الغرام واستوى
محتاج نفس.... م الهوا
انا غنوة..... غنييني
لو نارىحراقة
دة عنىكى سرراقة
تسرق جفون الليل
للحب..... مشتاقه
حيرنى رمش العين
والورد ع... الخدين
غرقت انا ف الدين
حاشتغلو..... سواقة
قلبى أهومكفى
انا عارفه..... بيوفى
حبه وغرامه..... جميل
معدول... ومش مكفى
أصيل..... وابن أصول
عالي المقام على طول
مهما الكلام..... بيطول
موزونومتقفى
أردب مش..... وقة
وحدة..... موازىنى

والرك ع الرقة
والشوق..... موازيني
رسمت..... ع الورقة
سطورتوازيني
طلعت حروف بارقة
نورها..... موازيني
حارسى في موانيكى
وحاغنى..... غناويكى
والف..... كل الكون
وارجعاكيد ليكى
بحر الحنان..... إنسان
وشطه..... مراسيكى
مالي...سواكى أمان
تستاهلى..... معاليكى

على شط بحر الذكريات

على شط بحر الذكريات ..
احلام كثيرة وأمنيات ..
واقف هنا .. لكن عيوني سرحانين ..
شوق للي عدّى من سنين ..
كلي حنين ..
لكن بتغلبنى الالهات ..
وتفر دمعة من عيوني الحيرانين ..
تواسيها إيدي فوق خدودي ..
يا موجة جودي وقربي .. ولا تهربي ..
وحشاني لحظة من اللي فات ..

غناء السيل

صباح الخير .. على الأمة
غناء السيل..... و الهمة
يازبد البحر....فاض زبدك
بدون فائدة.. بدون لازمة
صباح يشجب.. ويتتط
صباح يرفض.. ويستعبط
صباح هايف.... و متلخبط
ومش بيحل... في الأزمة

عيشيني الود حبة

عيشيني..... الود حبة
حلي ليلي..... بالمحبة
ارسمي.. نجم بسماكي
والقمر وياه ف صحبة

هلي في الأحلام بطيفك
واسرحي.... فيها بكيفك
زوري نني العين بصورتك
مش كضيفة لأ ده ضيفك

إروي نبع الشوق تلاقى
واشعري معنى اشتياقي
وازرعي..... زهر بعبيره
خلي عطر... الحب باقي

عيدي الكلام

عيدي الكلام..... من أوله
علشان أشوف كل اللي فيه
حرفين شقاوة بيسألوا
حرفين غلاوة بيتقلوا
مستنيين إحساسي بيه
شطين وبحر..... ومركبة
ومارية سحر و موهبة
وغرامي قلبك بيناديه
الموجة بتحن..... لهوى
وسفينة تجمعناسوا
ساعة اللقا... والشوق ماليه
يا اسكندرية..... يا سكرة
شهد وحلاوةمكررة
والرمش بحر انا توهمت فيه

ليلة الفرح

في ليلة جانا الفرح
والسعد دورنا
وجه معاه الأعبة
ودخلوا دوارنا
علقنا زينة ونور
وفرشنا مندرنا
سهرت معانا النجوم
ونورت ليلنا
ومن ليلتها الفرح
مطلعش من دارنا

احسائي بيك

فتح عنيك ..
واكتب تباشيرك أمل
لون على صفحة حياتي
بلون جديد
يبدأ مع نهاري الوليد
واجعل شروق شمسك
يصيغ أحلى الجمل

افتح لي باب
بكرة اللي شايفه ف ضحكك
وافرش على سكة حياتي
نور يوماتي بطلتك
زهرة شباب عمري ف إيديك
باين جمالها من عنيك
وعبيرها زاد من هلتك

دفي المشاعر كلها
بلمسة إيديك

وشوش ودع بحري ف هواك
همس الغرام
عيشني حالة من التفاؤل
والهنا وحلو الكلام
واخطفني مع حلم اللقا
وإحساسي بيك

فاصل ونواصل

أمانى كثيره عاشقينها
لكن فينها؟؟
وليل العنمة بقى سارح في ميادينها
بقى مغلغل ومتجدر بقى عايم
بقى سادد .. في شراينها
وصوت خافت
قلوب من قهرها خافت
وصرخة حق بتنادي على بكره
ولا بيسمع ولا له ودان
ولا حتى عنيه شافت
وامتى الفجر حيشقشق على أرضك
وامتى العزم حيورق على شجرك
انا مستنى طاقة نور
تنور بالأمل طولك
وتكسي بالأمان عرضك
ومستنى تظلي يا شيخة انا ف عرضك
.. مادامت طلتك سكر
فبيقى خلاص
.. ومش عاوز انا سكر
ومستغني عن التحلية من أصله

ومش حسأل عن الموضوع ولا سيرته
ولا حدور على أصله
لأن البحث حيجنن
وممكن يقلب المخيخ
وأسبب انا ف فصله
لأن العقل والمنطق
في أيامنا بقى أوهام
وباتذكر سنين فانتت
وبهرش راسي بالإبهام
سنين كنا بنتكلم
وكانت الكلمة بمشاعر مع الإلهام
لكن راحت سنين الكلمة واتمسحت
مع فاصل من الالام
مشاهد حية قدامي
لكن في الاصل مش حية

غيبتي ليه

غيبتي ليه... من غير كلام
ولاحتى نظرة..... أو سلام
طمينيني..... مرة واحدة
إن شالله حتى.. في المنام
أنا رمش عيني داب سؤال
وحشاني حتى في الخيال
مستني اشوفك... واندھك
واملا عيوني..... بالجمال

قلبي طبطب

قلبي طب طب لما شافك
ياللي دوقتيه..... خوشافك
ياللي شربتيه..... فراولة
ياللي أكلتيه..... جوافك
كل طعم الحب عندك
مش حخاصمك .او اعاندك
ياللي فيتامينك..... سحرني
واتعدلت انا... من مساندك
يا فواكه روح..... حياتي
حلو كوكتيلك..... ليلاتي
شفطة سكر منها بسكر
مش حفكر يوم.... في ذاتي
فكري مشغول... من عيونك
فرطتي عنقودي.... بجنونك
مش حلومكأو أصومك
مش راح اشبع.... من حنانك

مش راج اكذب

ايه دة كله .. ايه دة كله
انتي ورد الكون وفله
مهما اكتب مش را اكذب
من كلامك عطور يهلوا
كل حرف وله حكاية
حلو خالص يا هانايا
انتي شمس الكون معايا
مهما اقرأ مش حملة
حبي راقى..... مش أناني
حتى نغم الشوق شجاني
وما حس..... بقربي منه
الدلال زاد..... في المعاني
والأماني..... والأغاني
الحقيقة..... مغلبناني
لو سألت..... ف مرة قبي
تلقي حبه..... شكل تاني
لما حبك..... اشتراني

بعث كل الكون وجيت لك
عشت فاصل..... م المعاني
والليالي..... وسعت لك
دوبت وياك... في الحقيقة
والنجوم كانت..... رفيقة
كل لمسائك..... رفيقة
والأمني..... فتحت لك

قلبي ساكن

قلبي ساكن جوه ذاته
عاش حقيقة وعاش خيال
كل لحظة من اهاته
تشتكي مر السؤال
يوم يحب ويوم بيكره
يوم يصاحب يوم ف ذكرى
نفسه يجي ضي بكرة
تحضنه كل الامال
حط يومه جنب أمسه
عاش في بكره وعاش امال
ماضي فيه الذكريات
فيه سعادة وفيه أهات
وفيه حنين من عمر فات
وفيه هموم فوق لحتمال
والآماني صوت بعيد
فجر يبدأ يوم جديد
فيه إرادة من حديد
مالوش مكان ويا المحال

كل واحد جوة ذاته
خلى روحه ساجنة ف سكاتة
وف حياته زادت آهاته
ويا ملايين مسجونين
والسكات بقى نبض هادر
قلوب ترج بصوت يهابر
والإيدين ويا الحناجر
عبرت بمرار سنين
كل واحد جوة منه
هم يكبر معاه في سنه
ويبقى نفسه في يوم يلاقي
إيدين تطبطب عليه يحنوا
والحنان بقى عملة نادرة
والأمان عامل مغادرة
والفجر عينه قوية قادرة
م الظلم باتوا قلوب يئنوا

قلبك

قلبك أنا مش حسأله
هو اللي حيقول الكلام .. من أوله
يحكي حكاية .. عشقنا
وازاي بنينا طوبة طوبة .. ف عشنا
إزاي زرعنا في المكان إحساس حنان
خلينا لون الورد هو .. نقشنا
ورسمنا بإدينا الحنين على .. وشنا
لما اوحشك خبي العيون جوه الجفون
حتلاقي جنة من الخيال
وانا وسطها بقلبي الحنون
فارد جناح الشوق .. أمل
من غير كلام .. من غير جمل
ونطير بعبيد فوق في السما

———— ديوان كتب القلم ————

نلمس بأحلامنا السحاب
نهمس بإحساسنا اللذيذ بعد الغياب
أمسك اديكي في الهوا
نكتب سوا في الحب يجي ألفين كتاب
إنتي وأنا .. قصة كتبها لنا القدر
أسطورة في علم الغرام
راح تتحكى لكل البشر

———— للشاعر/ أيمن خليل ————

قلب العروبة

قلب العروبة بينضرب..
فين الشهامة يا عرب؟
ولا خلاص مات الضمير..
والدم في عروقكم هرب
شايبيين مدابح ع الشاشات..
قتل وإبادة بطيارات
أطفال صغار و شيوخ كبار..
دمهم مالي الحارات
وانتم قلوبكم من حجر..
لا قلوب تحس.. ولا نظر؟
انقذوا قلب العروبة..
الوضع قمة في الخطر
دما بيروح هدر..
دما بيروح هدر

قصة هوانا

اكتبي قصة هوانا
كل حرف بلون سمانا
كل لمسة وكل همسة
كل تنهيدة ف لقانا

دوني ذكرى بحر وفك
سجلي ظروفى وظروفك
ارسمي نجومى ونجومك
يشهدوا الأحلام.... معانا

عيشي لحظة شوق خيالي
والضمي حالك..... بحالي

خلي آمالك..... آمالي
تبقى م الأيام..... دوانا

واعملي عقد..... الغناوي
علقي فيه..... الحكاوي
كل نظرة عين..... تساوي
عمر عايشينه..... بلقانا

قرايين الهوى

أنا مملكش غير نفسي وإحساسي
وأقدر أقول بان مشاعري م الآخر
تخص هواكي من ساسي لأعلى جزء من راسي
ومتأكد بانى لو حغيب عنك
حتبقى غيبة مرهونة بأنفاسي
لكن روجي حتفضل في الهوا ترفرف حوالىكي
فليه القسوة يخربيت شيطان حبك
قوليلي ايه بيرضىكي؟
وايه هي قرايين الهوى والشوق؟
عشان اقدمها لسيادة معالىكي
وامتى في حكم أعرافك أكون معشوق؟
وامتى أفوز بلمحة قرب من روحك
فبصراحة بقيت مخنوق
وحاسس إن أحلامي بتتمشط مع الأوهام
بتضفر و ضفايرها بكلمة ليه مع استفهام
ويظهر إن إجاباتك بدون برهان
بدون تعليل مع فاصل من الإبهام
فمش عارف أمرار شكوتي لغيرك
وعاوز أقدم الإقرار لقلبك ويا تفكيرك

بخطي و عرض حال سيرى
وطابع حسن نويابا فى تأثيرك
فأرجوكى عشان خاطر نجوم الليل
جايبها معايا تتوسط لإحساسك مع المواويل
ولحن وكلمة مقسومة على حرفين
أقولها بحب يمكن الاقيا فى مشاعرك مكان لنزىل
فمش قابل أنا أعذار
ولا حقىل تقولى كلام كانه هزار
أنا طالب وداد حالك
وكل كلامى من قلبى بضمير سالك
أنا مستنى مش ماشى
ولو غيبتى سنين برضو ما يجراشى
أنا والشوق ودقة قلبى نتسامر
ويفضل جفن أحلام الهوى ساهر
حيفضل جفن أحلام الهوى ساهر

كل فاسد

كل فاسد عنده حجة
خلى وضع الناس ف عجة
خلى طعم الحلوة مرة
خلى ريحة الظلم فجة
في الشوارع والبيوت
مد إيده العنكبوت
واحنا ساكنين في التابوت
شكنا في الخلق ... فرجة
ساقية دايرة .. وعطشانين
من هدومنا طفشانين
زي كورة ومتشاطين
زي تور بيلف. سرجة

كل مرة نقول خلاص .
حتلاقي أرواحنا الخلاص
وينتهي زمن التلاص
ونلقى فرع الأمان منبت
ونلقى نسمة مودة هبت
والعزيمة ف روحنا دبت
يفجعنا صوت طلق الرصاص

كتب الوطن

كتب الوطن حكايات
على صفحة الأزمان
واتحقت آيات
مذكورة في القرآن
ظلم البشر للبشر
العدل كفه انكسر
والناس في حالة خطر
من هوة البركان

كتب الوطن غنوته
زاد م الألم عآته
تاقت كمان سكتته

— ديوان كتب القلم —

وغيروا العنوان
إمتى اللي راح حيعود
نلقى الأمل مولود
يتحقق الموعد
على إيد ضمير إنسان

— للشاعر / أيمن خليل —

أرجو النعيم

أرجو النعيم براحتيك
والنفس تهفو لمقلتيك
يا عاشقا طاب الهوى
فالقلب مشدودا إليك

كم ذا يكابطني الغرام
ويتوق قلبي إلى المرام
أضنى فؤادي لوعتي
والبعد في الحب حرام

زاد اشتياقي وما هنا
والقلب دق وما هدأ
والروح هائمة تدور

———— ديوان كتب القلم ————

والفكر يبحث عن نبأ

ياليل رفقا بالقلوب

فمشاعري حقا تذوب

الحب أضنى مضجعي

والعشق دائي ولا أتوب

———— للشاعر/ أيمن خليل ————

إِرحم الآهات

إِرحم الآهات لطفًا
ضيف حبك لايضام
لا تغض عني طرفًا
جفن عيني لا ينام
لو كتبت إليك حرفًا
ألتقي حلو الكلام
إفتح الأشواق شرفًا
كي يخللها الغرام
زادني الإحساس شرفًا
فيه سحر مستدام

فيك الحياة

فيك الحياة تجملت و تجسدت
ووجدت روعي في العيون توسدت
أدركت أنني قد أنست بمقلتيك
وحياتي من فيض العبير تنفست
أمن العيون ومن الجفون.. سحرتني؟
أم همس قلبك قد أطاح بمهجتي؟
بالله قد نال الغرام صبابتي
ومشاعري في عمق قلبك لامست

أسارى هواك

قلبي وعيني..... أسارى هواك
وأحبو وأصبوا....إلى منتهاك
سأغدو عليلا..ضعيفا هزيلا
إذا زال طيفك.. وغابت سماك
أتوق اشتياقا ونفسي... تهيم
وروحي تناجي هواي السقيم
تعالى وداوي... جراح التهاوي
إليك سأوي..... فمالي سواك

فأنت الأمان..... وكل الحدود
وانت حياتي.... وكل الوجود
فقلبي يحن..... وعيني تنن
وإن غبت عني....يزيد الشرود
إليك أهادي..... قطوف الوداد
وأرسل عشقي ليحمل سهادي
ويحمل نبضي... ليهدأ فؤادي
ويبقى عبير هواك..... ورود

إقذف حجر

أدعوك أن تقذف حجر
في صدر ظالم... للبشر
في وجه طاغ.. مستبد
فلقد أصابني.... الضجر
إقذف بقدر... فسادهم
إقذف ضلال... جباههم
كن للحقوق..... مدافعا
ولا تهاب.... رصاصهم
حجرك كسهم... مناضل
رمح قوي..... قاتل
سدد ولا تخشى... أحد
وانهي حياة..... الباطل

الاقصى يستنجد بكم

هيا.. بنا.. الى الاقصى يا مسلمين
الاقصى.. يدعوكم..... فكونوا.. ملبيين
قوموا ارفعوا راياتكم.... الاقصى ..يستنجد.. بكم
لبّوا نداء.. للجهاد... يا... مؤ منين
يا..خير.. أمه... أخرجت.. للعالمين
هيا اجعلوا.. صيحاتكم... ترهب قلوب... أعدائكم
الى متى تبقى فى هون.. ساكنين
مستسلمين للعدو... و مسالمين
ضحوا.. بكل دمائكم... من.. أجل نصره.. قدسكم
كونوا.. لبيت الله..... خيـر.. محررين
ولنصرة... أرضه..... نعم... الناصرين
الاقصى يطلب نصركم... بجهادكم... يكفا حكم
يا أمة الاسلام... و الحق... الميين
يا أمة التوحيد.. يا خير... مؤيدين
عودوا لسابق عهدكم... وأستيقظوا... من... نومكم
توحّدوا وتماسكوا.. يا... حاكمين
وقفوا فى.. وجه.. الحاقدين... المجرمين
النصر.. فى اتحادكم.. هيا.. فنحن... ورائكم

العدل

العدل طريقٌ..... وسبيل
عنوان للحق..... دليل
والظلم ظلامٌ..... وسرابٌ
وضبابٌ في الأفق.. طويل
والقلم سلاحٌ..... وكفاح
ينطلق بحبر..... فواح
لا يرضى بقهر..... وسفاح
أو يخنع في ثوب..... ذليل
والوطن ترابٌ..... وسماء
خير و إباءً..... ونماء
لا يرضى نفاقاً..... ورياء
أوسندٌ من يدٍ.. عميل
العدل ميزان... و أمان
ويفيض بنور.. الرحمن
والظلم عوار..... ودمار
وغمار فساد... وهوان
والقلم رسول... مأمول
بالفكر ينادي... ويجول

قاطع كالسيف المسلول
ينطق بالحق.... وبرهان
والوطن طريح وجريح
وذبيح ملوك .. الطغيان
باعوه وباعوا ضمائرهم
وأباحوا دماء... الغلمان
العدل حدود.... وسدود
وشرائع بالحق... تجود
أنزله الله بقرآنه
فتجلى الوعد الموعد
والظلم سقيم... وعقيم
وخبِيث في الفكر. لئيم
والقلم كرامة.. وقوامة
يلتزم الأخيار.... زمامة
يقذف بالحق... عباراته
يرسل للطاغين. سهامه
والوطن أمان... وحنان
وجنان النفس. وريحان

يحظى بالحب.... وبالود
مقصد للقلب.... وعنوان
العدل بديع..... وربيع
ومقام عال..... ورفيع
تتفتح زهرات..... جنانه
في مشهد راق..... ومتيع
والظلم وضيع..... وفضيع
وضمير في الحق.. صريع
يتمدد كفرا..... ونفاقا
يشتري في دمانا... ويبيع
والقلم حصانة.... وحصانة
يكتب يتهادى.... بأغصانه
لا يخشى اللوم.. من اللائم
للحق جواده..... وحصانه
والوطن آياتي..... وحياتي
والأمل المنشود..... الآتي
أمنحه الروح... مع النفس
وله أشواق..... تحياتي

صفحة ٣	- إهداء
صفحة ٥	- تقديم
صفحة ١١	- دارت الايام
صفحة ١٢	- خلينا قاعدين
صفحة ١٤	- خط القلم
صفحة ١٦	- دوقيني
صفحة ١٨	- رموشك سفينتي
صفحة ٢٠	- رغيبي
صفحة ٢١	- رباعيات
صفحة ٢٤	- سبيل النور

- حوار سجاي بين س و ص — صفحة ٢٦
- زهري — صفحة ٢٩
- زرعت وردي — صفحة ٣٠
- صباح الاماني — صفحة ٣١
- لما حبك اشتراني — صفحة ٣٣
- انتي فينك — صفحة ٣٤
- سنين فات — صفحة ٣٦
- سلطان — صفحة ٣٧
- صباحك شوق — صفحة ٣٨
- صباح الخير — صفحة ٣٨
- صباح الخير — صفحة ٤٠

- اصل الهوي ٤٢ صفحة
- صرخة ٤٤ صفحة
- صباحك حليب ٤٥ صفحة
- على جبينك ٤٦ صفحة
- طماعة ٤٨ صفحة
- طلة واحدة ٥٠ صفحة
- عندليب الدقي ٥١ صفحة
- عناقيد الغرام ٥٢ صفحة
- عى شط بحر الذكريات ٥٥ صفحة
- غناء السيل ٥٦ صفحة
- عيشيني الود حبة ٥٧ صفحة

صفحة ٥٨	- عيدي الكلام
صفحة ٥٩	- ليلة الفرح
صفحة ٦٠	- احساسى بيبك
صفحة ٦٢	- فاص ونواصل
صفحة ٦٤	- غيبتي ليه
صفحة ٦٥	- قلبى طبطب
صفحة ٦٦	- مش راح اكذب
صفحة ٦٨	- قلبى ساكن
صفحة ٧٠	- قلبك
صفحة ٧٢	- قلب العربيه
صفحة ٧٣	- قصة هو انا

— ديوان كتب القلم —

- صفحة ٧٥ - قرابين الهوى
- صفحة ٧٧ - كل فاسد
- صفحة ٧٩ - كتب الوطن
- صفحة ٨١ - ارجو النعيم
- صفحة ٨٣ - ارحم الآهات
- صفحة ٨٤ - فيك الحياة
- صفحة ٨٥ - اساري هواك
- صفحة ٨٦ - اقذف حجر
- صفحة ٨٧ - الاقصى يستنجد بكم
- صفحة ٨٨ - العدل
- صفحة ٩١ - الفهرس



مع تحيات دار الحسيني للطباعة والنشر والتوزيع

رئيس مجلس الادارة

عبد القادر الحسيني

المشرف العام

محمد عبد القادر الحسيني

المدير العام

عصام عبد القادر

نائب المديين

مختار عبد القادر الحسيني

الهيئة الاستشارية للدار

الدكتور حسام عقتل الدكتور علي جادا الحق

الدكتور لطفي سيد صالح الدكتور بسيم عبد العظير

الاستاذ عاطف عز الدين

— للشاعر / أيمن خليل —